



ESPERANTO JE LA SERVO DE L' TUTMONDA PROLETARO SENNACIULO

OFICIALA ORGANO DE SENNACIECA ASOCIO TUTMONDA
KULTURA KAJ INTERHELPA ORGANIZO DE PROLET-ESPERANTISTOJ

APERAS
SEMAJNE

REDAKTEJO: 14, avenue de Corbéra, Paris 12e. — GVIDANTO: E. Lanti. — SIDEJO DE PLENUM-KOMITATO
DE SAT: 23, rue Boyer, Paris 20e. — ADMINISTREJO: R. Lerfner, Kolmstrasse 1, Leipzig O 27 (Germanio).

APERAS
SEMAJNE

RIFO SUR LA VOJO

La legantoj, kiuj ricevis la lastan dekspagan n-on de "S-ulo" kun tre kuraĝiga enhavo, estos sendube mirigataj k konsternataj, ricevante, unu semajnon poste, ĉi tiun kvar-pagan n-on kun sciigoj pri nia preskaŭa bankroto.

Kiel tio povis okazi? Ĉu do la Administranto k librotenisto de SAT frenezigiĝis k fuŝis la kalkulojn, erarigante nin pri la aktivo de nia Asocio? Tute ne! La bilanco de SAT montras aktivon k ĝi entenas la necesan sumon por aperigi nian semajnan organon kiel antaŭe. Bedaŭrinde tiu nia mono kuŝas en Moskvo. Je la 31. majo ni havis tie krediton de pli ol 15 000 germanaj markoj (90 000 fr. frankoj)! Kaj la transsendon de tiu sumo la Soveta Registaro lastatempe malpermesis (Vidu la noton de l' Administranto en n-o 298, pĝ. 436).

Sendube multaj K-doj emos riproĉi al ni pro tio, ke ni agis neprudente, sendante niajn varojn al Sovetio, ne ricevinte por ili monon. Ni sekve ŝuldas al la tuta SAT-anaro sufiĉe detalajn klarigojn pri la afero. Ĉu fakte ni kulpas en tio, ke ni ne antaŭvidis la eblon, ke iam la Soveta Registaro malbligis la normalan funkciadon de SAT, de laborista organizo, kiu tiom multfoje k amplekse raportis favore pri Sovetio? Ĉu ni povis supozi, ke iun tagon oni malpermesos transsendon de eĉ unu kopeko?

Fakte niaj Sovetiaj K-doj ĉiam havis malfacilojn por transsendo de mono. Lastan jaron ili ricevis permeson transpagi nur 4000 dolarojn dum tuta jaro. Tiu sumo tute ne sufiĉis por pagi la menditajn varojn, k nia Administranto decidis ne plu liveri al Sovetio librojn de fremdaj eldonejoj, insignojn, poŝtkartojn, kovertojn.

Jam provinte iom ekvilibri la konton en lasta jaro per eldono de kelkaj

libroj en Moskvo, ni instrukiis ree je 12. februaro, 30. aprilo, 27. majo 1930, ke oni presigu por SAT en Moskvo verkojn. Tie kuŝas kelkaj ampleksaj manuskriptoj tute pretaj por eldono. La verkoj ne estis presitaj...

Eĉ la *dumonata* "Sennacieca Pedagogia Revuo" ne estas presita akurate, kvankam la manuskriptoj por la dua k eĉ por la tria numero de tiu Revuo estis transsendataj tre akurate de la Redakcio en la presejon! Nek libroj presiĝis, nek mono alvenis. Fakte dum periodo de tri monatoj: marto ĝis junio de nuna jaro, la Administrejon trafis nur sumeto de 257,50 dolaroj el Moskvo!

La kaŭzojn pri tiuj prokrastoj ni ne tute precize konas. Eble ni ekscios pri ili pli poste. Hodiaŭ ni nur celas montri al la Legantaro, ke jam de longe ni multe klopodis por normaligi la monajn aferojn kun nia agentejo en Moskvo. Multajn instigojn ni direktis al niaj tieaj K-do. Je la 16. 5. 30 nia Administranto en Leipzig sendis insistan peton al K-do E. Drezen, ke li uzu sian influon ĉe la koncerna registara instanco por reguligi la transsendon de mono. Al tiu instigo nia Administranto ricevis jenan resp-ondon:

Moskvo, 23 — V — 30.

Al

K-do

Rich. Lerchner,

Kolmstr. 1, Leipzig O. 27

"....."

"Pri la mono al SAT sendota de SEU — la stato ankoraŭ plimalboniĝis. Demidjuk pri tiu afero jam skribis al Bässler k montris vojon, kiamaniere provi rebonigi la situacion. Vi ja komprenas, ke SAT nun ne estas ĉe ni atentata tiel, kiel antaŭ 3—4 jaroj. Krome ankaŭ mi persone estas metita de parizaj direktantoj en tian

situacion, kiam mia persona (ne tiu de SEU — oficiala) interveno por SAT — povus ŝajni nur tre stranga.

Kun saluto

via E. Drezen."

La 8. junio 1930 K-do Demidjuk, Plenumkomitatano de SAT, sciigis nin, "ke en majo jam la popolkomissario oficiale informis la Centran Komitaton de SEU, ke ĝis oktobro oni tute ne povas doni valuton por transpago k nun ni ne povas transpagi eĉ unu dolaron. Ricevinte la rifuzon ni tuj protestis ĉe la superaj instancoj... La 6 — VI — 30 estis esplorata nia protesto ĉe la supera instanco k oni refoje konfirmis la rifuzon, metinte en la tagordon por aŭgusto specialan kunsidon por solvi la aferon."

Krom tio klopodoj estis ankaŭ farataj de K-do Bässler, Plenumkomitatano de SAT, ĉe la presejo en Leipzig, por ke ĝi ankaŭ klopodu por atingi, ke nia mono estu transsendata el Moskvo. Ĝis nun tiuj klopodoj ne sukcesis. Ni do estis devigataj presigi ĉi tiun n-on nur 4-paĝe por ne pligrandigi nian ŝuldon al la presejo k dume atendi, ke mono el aliaj lokoj envenu en la kason por iomete reekvilibri nian buĝeton.

Pesimismo estu for!

Evidente per tiu decido de la Soveta Registaro SAT ricevas fortan, tute ne-atenditan de ni baton. Sed la K-doj bonvolu kredi, ke malgraŭ ĉio ni restas optimistaj pri la vivo k estonto de nia Asocio. La proksima n-o de "S-ulo" estos 8-paĝa k ni ne havas dubon, ke la gazeto povos aperi regule k akurate kiel antaŭe. Eĉ se nia monafero en Moskvo ne solviĝus kontentige, ni tamen opinias, ke en la daŭro de ses ĝis ok monatoj ni povos varbi sufiĉe da novaj abonantoj por povi denove aperigi nian semajnan organon dekdupaĝe.

Cetere ni gardas la esperon, ke en Moskvo la fervoraj k lojalaj SAT-anoj sukcesos atingi, ke oni el tie povu sendi monon por aboni la SAT-organojn k aĉeti SAT-librojn. — Almenaŭ, ke oni sendu la ŝuldatan sumon por liveritaj varoj. Depost 10-jara aperado de SAT-organoj estas ja la unua fojo, ke ni devas interrompi ilian liveradon al Sovetianoj. Unuafoje Sovetiaj K-doj, kutimiĝintaj al regula legado de "S-ulo", sentos la mankon de sia ŝatata amiko, kiun ĉiam volonte per mono ili pretas subteni. Ni bone scias taksu la maldolĉon de l' situacio, tiel por la Asocio entute, kiel por niaj Sovetiaj K-doj tute speciale, k ni estas certaj, ke ĉi lastaj faros ĉion, kion ili povos, por nuligi la decidon de sia registaro.

La farita decido povas nur rezulti de ne ĝusta informiĝo ĉe la koncerna Instanco. Ĝi estas signo de "rusto" ĉe

ŝtata aparato, rusto kontraŭ kiu batalas la sovetia proletaro. Ĉiu honesta homo, kiu konas la staton de SAT, ja devas konfesi, ke ĝi multe da utilo faris al Sovetio k sekve meritas tute ĝian favoron.

Dume la K-doj el la landoj, kie nia Asocio povas senbare funkcii, devas streĉi siajn fortojn por helpi al ni eviti la rifon, kiu stariĝis sur nia vojo. Ili varbu, varbadu novajn abonantojn, ili monokolektu, ili ĉiel agitu por ke baldaŭ "S-ulo" rehavu siajn dekdu paĝojn.

En malfacilaj horoj oni ekkonas siajn verajn amikojn. Ili stariĝu garde ĉe la flanko de nia Asocio. Ili almenaŭ havu la certon, ke niaflanke forestas ĉia malkuraĝiĝo, ĉia pesimismo. Ni staras firme k ni eltenos...

24. junio 1930.

DIREKCIO DE SAT.

VOĈOJ DE SAT-ANOJ

La klarigoj, kiujn ni publikigas sur la unua pĝ., espereble pravigos nian sintenon antaŭ la okuloj de la K-doj, kies leterojn ni ĉi sube publikigas. Ni nur aldonu, ke ni konservas la esperon, ke finfine la situacio normaligos.

Ĉu SAT-Direkcio lasos daŭri...?

Mi afable petas SAT-Direkcion atenti ĉi tiujn liniojn k enpresigi ilin en "S-ulo", por ke la tuta SAT-anaro havu okazon eldiri sian opinion. Kritikojn mi tre malofte direktis al niaj amikoj, kiuj tiel lerte k zorge plenumis kreon k disvolvon de nia — de la vivo tiom pravigita — asocio. Tamen, sen nuba ne ĉiam restas la ĉielo! ankaŭ ne mia admiro! Mi kulpigas la SAT-Direkcion pri ĝia troindulgemo rilate al sendo de SAT-mono el Sovetio. Ofte jam ni povis legi, ke SAT-mono estas retenata ĉe SEU pro registara malpermeso forsendi monon super iu fiksitita sumo. Dume al niaj eldonservoj mankas kapitalo, k la abonprezo al "S-ulo" laŭ belgiaj K-doj — restas tro alta.

Tiu situacio kaŭzas malbonojn al SAT! Urgas, ke ĝi estu modifita! Cetere, tio estas por mi nekomprenebla! Kiel klarigi, ke proleta registaro malpermesas forsendon de mono al proleta organizo? Ĉu ĝi timus, ke etaj SAT-enspezoj — guto en la maro — malfirmigu ĝian financon ŝtaton? Certe ne! Kiom ajn ni bedaŭru por SAT, ke tia timo nur estus ridinda! Sed tiam, kio malhelpas, ke laborista mono el Sovetio estu tuj transpagata al laborista asocio, kies aparaton k servojn tiom uzas la kom. esp-istoj por rilati kun eksterlando k propagandi por Sovetio?

Mi tre ŝatus, ke "S-ulo" publikigu la sumon retenatan en Sovetio. Supozeble ĝi estas alta k certe ĝi interesos ĉiujn SAT-anojn. Ĉiuokaze mi pro-

ponas, ke SAT-Direkcio senpere klopodu, por ke la sovetia SAT-agentejo povu tuj k regule transpagi siajn enspezojn al Administracio de SAT. Se ĝis la Londona Kongreso neniu favora decido estos atingata, la Kongreso mem alvoku per rezolucio la Sov. Registaron petante, ke ĝi ĉesu paralizi la vivon de — laŭ vidpunkto de internacia edukado — alte taksinda asocio de laboristaj esperantistoj. Ankaŭ agutiusence niaj K-doj SAT-anoj en Sovetio mem, ĉar finfine ni devos peti, ke SAT limigu la abonantaron en Sovetio. SAT-Direkcianoj! via indulgemo troiĝis, agu por ke ĉesu tiu netolerinda situacio!

M. van Aelst (155), Bruselo.

*

K-do Kamij Ru (835), Francio, skribas: "Mirigite mi legis en la lasta n-o de "S-ulo" pri la malpermeso de la sovetia registaro rilate la transsendon de mono al Leipzig por la SAT-enspezoj. Mi tute ne povas kompreni tian sintenon kontraŭ lab. asocio, kia estas SAT. Nenio povos pravigi tion je la okuloj de tutmondaj laboristoj. Se tiu decido estus definitiva, ĝi praktike estus malpermeso de SAT en Sovetio. Per tiu faro la sovet-registaro, esence laborista, kondukus kiel tiuj de la blankteroraj landoj. Tio ne povas esti.

"Mi vokas al sovetiaj K-doj, kiuj laŭ konstitucio povas k devas sciigi sian opinion k influu sur la lab. registaron, ke ili vortigu sian opinion pri tio k nepre agu. Ankaŭ la tutmonda SAT-

anaro devas ion diri, certe la paĝoj de "S-ulo" estos al ili por tio malfermataj."

*

La SAT-rondo de Bournemouth k Christchurch (Britio): "Kun granda indigno ni legis pri la honta situacio ekzistanta ĉe la financaj rilatoj inter SAT k la Sovetiaj K-doj. Ne estas kredeble, ke la individuaj sovetiaj SAT-anoj konsentas al tiu situacio, kiu fakte estas nenio alia ol rabo al ceteraj K-doj-fratoj. Oni povus kredi, ke la kondiĉoj en Sovetio sub laborista registaro estus pli favoraj al propagando por la lab. esp. movado, ol en multaj aliaj landoj, ekz. terorlandoj.

"Ni havas la opinion, ke la nepago de mono por varoj ricevataj de sovetiaj K-doj estas fiago, kiu perfidas niajn fratojn en la terorlandoj. Plue, kion ajn faras la registaro, la respondeco restas kun la individuaj mendintoj k kiel K-doj ni atendas, ke ili akceptu sian respondecon k trovu rimedojn plenumi ĝin..."

Lasthore

Moskvo, 20 — VI — 1930.

"...mi nur informas vin, ke mi ricevis de la financpopolkomisario la demandon, kiom ni bezonos por transpagi eksterlanden dum la estonta jaro. Tio pruvigas, ke la nunaj malhelpoj estas provizoraj..."

G. Demidjuk.

ĈU INDIGNI AŬ KOMPATI?

Ni represas ĉi sube tekston, publikigitan en la angla gazeto "Daily Worker" (n-o de la 23 — VI — 30). Sendube multaj legantoj same kiel ni ŝanceliĝos por decidi, ĉu ties aŭtoro indas vekti indignon pro malica k mensoga diro aŭ kompaton pri sia juĝkapablo. Ĉiel ajn la fakto, ke tia teksto povis aperi anonime en lab. gazeto estas sufiĉe karakteriza pri bedaŭrinda spiritostato, kiu provas enŝteliĝi en niaj vicoj, k sekve ĝi meritas esti substrekita, dum ni lasas al la "franca SAT-anaro" la zorgon protesti, se ĝi juĝas tion necesa.

"La imperialistaro starigas kontraŭ-sovetan blokon. Polujo, Jugoslavujo, Ĉeĥoslovakujo k lastatempe Rumanujo estas regataj ĉefe de la franca imperialismo. Ĉe la lab. esp-ista movado kelkaj provas doni malfirman, sensignifan komprenon aŭ difinon al Sennaciismo. La sovetaj k aliaj revoluciaj SAT-anoj batalas kontraŭ tia reakcia paŝo, k deziras, ke SAT nun, kiel estinte, konstatu, anstataŭ provi kaŝi, la klaslukton. Pro la nuna sinteno de SAT pri la klaslukto preskaŭ 45 elcentoj da sovetiaj esp-

istoj ne aniĝis al ĝi dum 1930. La kontraŭsoveta bloko estas starigita, laŭ grava grado de la franca imperialismo; la bastardigita koncepto pri la Sennaciismo estas starigita laŭ grava grado de la franca SAT-anaro."

Ni korektiĝis nur la gramatikajn erarojn k ne aldonas komenton.

Plorinde!

En la gazeto "Le Combat Syndicaliste" (junia n-o) oni povas legi la informon, ke SAT estas "je la ordonoj de Moskvo". Sekve la "antiaŭtoritatuloj" ne devas aliĝi tian organizon.

Prenas respondecon pri tiu sciigo: Mademoiselle Grammont, 66, rue du Quatre Août, Villeurbanne, Lyon, Francio.

KONSIDEROJ DE JAPANA SAT-ANO

(Tro malfrue ricevita por enpresado en n-o 300).

Okaze de la epokfaranta numero 300-a de "S-ulo" ni akcentas, ke vi, legantoj, turnu vian atenton al bolanta en batalo Oriento, k kun tio mi pensas, ke estus ne malutile rigardi nian esperantan movadon en Japanio, kie la lingvo disvastiĝas plej forte el inter ĉiuj orientaj landoj.

Ĝis nun proleta esp. movado en Japanio malrapide marŝadis, sed hodiaŭ ĝi staras ĉe la sojlo al pli organizita, pli promesplena stato sub konscia gvido de organizo. Tial estas tiom pli raportinde pri la nuna stato de l' movado en tiu lando. La esp. movado en Japanio havas longan historion, sed nur antaŭ kvin jaroj SAT-anoj formis sian propran grupon en Tokio kiel "Kaŝiŭagi-rondo". Nur kelkaj K-doj kunvenadis studante SAT-verkojn, diskutante pri SAT mem, sed eksteren ili agadis kun nenia aktiveco.

Tamen, pro la akriĝo de l' klasbatalaj kondiĉoj, la rondo estis devigata sin turni eksteren de post proksimume du jaroj. Per SAT-propagando ni povis pliiĝi la nombron de SAT-anoj de 33 ĝis 67 en jaroj 1929/30, k la grupo sukcesis kolekti monon por esp. libroj donitaj al Ruĝa Helpo. Tio bone montras efektivan plivigliĝon de l' movado en Japanio. Agitiĝon kompreneble kaŭzis la ĝenerala penetrado de esp-o en proletan tendaron. Rilate al ekzisto k signifo de nia lingvo proletaj organizoj montras lastatempe favoran komprenemon. Ja speciale por japanaj proletoj, al kiuj ne eblas akiri scipovon de ia eŭropa lingvo, pro troa malfacilo, esp-o havas grandan gravon.

Jam de kelkaj monatoj "Scienco Proleta", kultura organo proleta, unu el la plej potencaj en Japanio, alprenis esp-on aranĝante kursojn, eldonante

ĉiumonate resuman folion esp-lingvan, en kiu oni, krom nura resumo de l' enhavo, raportas pri al eŭropanoj konigindaj aferoj. Tiu bona ekzemplo faras grandan efikon al samtendencaj organoj kun pli da forto. Esperanto penetras fine en la laboristaron, ĝis nun esceptitan de lingva studo.

Tiel la ĝenerala stato en nia lando postulas fortan nacian organizon: LEA kiu nun estas aspirata de ĉiuj laboristaj esperantistoj. Kaj jam ni preparas la starigon de tiu nova, forta naciskala organizo. Havante tian aparaton la prolet-esperantistoj nialandaj povos marŝi per grandaj paŝoj k akceli la movadon en ĉiuj orientaj landoj. La burĝa esp. movado en nuna momento haltas, stagnas, sed male, la proleta estas plena je espero k fortoj por batali, por labori. *Uada — J.*

10-a KONGRESO DE SAT en Londono (Britio), 3.—7. aŭg. 1930

5-a komuniko

Loĝado. Pro nesufiĉa subteno de la laboristaro ĉi tiea, ni estas devigataj anonci, ke senpaga loĝado estas severe limigita. Ni povas aranĝi malkaran loĝadon (3 ĝis 5 ŝil. por lito k matenmanĝo). Oni komprenu, ke tio ĝenerale kostas proksimume 7,6 ŝil., k la nombro de tiaj loĝejoj estas ankaŭ limigita.

K-doj ankoraŭ ne aliĝintaj tuj faru tion, ĉar dum aŭgusto Londono estas plenplena: speciale K-doj, kiuj deziras akcepti la proponon de malkara loĝado, nepre tuj aliĝu!

Senlaboraj K-doj ne povas atendi akiri laboron en Anglio, ĉar tio estas malpermesata. Pro la severa krizo, kiu furiozas ĉe ni, ne estas eble por ni subteni finance aŭ aliel K-dojn alvenontajn.

Donacelistojn kun tiom da mono, kiom estas kolektita, resendu la K-doj senprokraste.

Pasportoj. Se K-doj tiurilate havas malfacilojn, ili skribu al la sekretario. Rusaj K-doj estas petataj tuj akiri vizon.

Tendon starigi en Londono ne estas eble; ni povos aranĝi lokon por K-doj alportontaj tendojn, post la Kongreso.

Alveno. Ni petas la K-dojn sciigi nin pri la vojoj, laŭ kiuj ili alvenos. La stacidomoj k horo de l' alveno estu konigataj. Ni aranĝos renkonti ilin k gvidi al la kongresejo aŭ al la loĝejo.

Sakturniro. K-doj dezirantaj partopreni, devas nepre sendi siajn nomojn antaŭ la 15-a de julio al: A. W. Page, 35, Stanley Avenue, New Malden, Surrey, Anglio. Ne estas kotizo, nek premio. Ludado okazas ĉiuvespere de 18-a ĝis 21.30 h.

Vivkostoj. (1 ŝilingo = 12 pencoj) Pano kostas (4-funta) 8 pencojn, from-

aĝo (1 ft.) 1 ŝil., taso da teo 2 penc., taso da kafo 3 penc., poto da teo 3 penc. Malkaraj loĝejoj por 1 ŝil. nokte estas haveblaj.

Tramoj. Veturkosto per tramo plialtiĝas laŭ distanco, sed inter la 10-a ĝis 16-a horo ĝi kostas 2 penc. por iu ajn distanco. Oni ankaŭ povas aĉeti ŝilingan bileton, per kiu oni povas veturi ien ajn per iu linio, k ajnan distancon. Oni povas transiri de unu tramo al alia per la sama bileto, kiu validas por tuta tago. *O. K. K.*

ANTAŬKONGRESO

EN BRUSELO (BRUXELLES)

2. komuniko

Loĝado: La Gek-doj, kiuj deziras loĝi en popoldomo de antaŭurbo de Bruselo, notu, ke la prezo estas 11 frankoj belgaj kun matenmanĝo. Sed K-doj, kiuj deziras loĝi en la komundormejo de l' Popoldomo, devas anonci sin kiel eble plej baldaŭ, ĉar ni devas reteni la lokojn sufiĉe frue antaŭe, pro tio ke en tiu momento multaj eksterlandanoj estas en nia urbo. K-doj, kiuj ŝatas dormi en tendoj, povos ankaŭ plenumi sian deziron. Ni povos loĝigi 80 K-dojn en tendaro de laborista socialista junularo. Por K-doj, kiuj kunportos tendojn, ni havas sufiĉe da loko.

Fervojo: La kongresontoj rajtas ricevi rabaton (30% ĉe vagonaro k ŝipo) post prezento de specialaj kartoĵoj, kiujn ni presigos. K-doj, kiuj partoprenos nian antaŭkongreson, rajtos ricevi rabaton nur de Bruselo al Ostende. Aliaj, kiuj vojaĝos rekte al Ostende sen halto en iu ajn loko, ricevos la rabaton de la landlimo ĝis Ostende. Ĉiujn korespondantojn adresu al: K-do Jos. Lebacqz, 17 rue du Poinçon, Bruxelles.

PROPONOJ AL LA 10-a KONGRESO

3. Paragrafo 3 de l' Statuto tekstu: La membraro dividiĝas trifake: *aktiva* membro, *pasiva* membro, *subtenanta* organizo.

Nuna paragrafo 6 fariĝu 5/b; nuna 5/b forrestu.

Paragrafo 6 tekstu:

Povas esti *subtenanta* organizo de SAT:

a) Ĉiu grupo aŭ fakorganizo proleta (sindikato, kooperativo, partio ktp.) esperantista aŭ ne, kiu pagas almenaŭ 20-oblan jarkotizon (kompare kotizon de aktiva membro de SAT). b) Subtenanta organizo ricevas senpage po 1 ekz. de ĉiuj SAT-eldonaĵoj (inkluzive la periode aperantaj "Sennaciulo", "Nova Epoko"...); po unu 20-obla jarkotizo pli — subtenanta organizo ricevas po 1 ekz. pli de ĉiuj SAT-eldonaĵoj. c) Subtenanta organizo povas uzi la ĝeneralajn servojn de la Asocio, sed rajtas nek partopreni ian voĉdon-

adon, nek eniĝi ian organon asocian.

Motivigo: Ni proponas ĉi tiun kompletigon de la statuto, ĉar necesas pli klare skizi la vojon al organizoj, kiuj esprimas simpatian por nia movado. Per liverado de ĉiuj SAT-eldonaĵoj la Asocio kvazaŭ rekompencas ilian monan subtenon k samtempe akcelas, ke ili pli serioze rilatu al nia movado, kiu ankoraŭ estas tro izolita de aliaj prolet-organizoj. Per akcepto de tiu ĉi statut-kompletigo SAT certe profitos morale, k eĉ finance. Pli detala motivigo certe ne necesas, ni nur deziras, ke dum la Kongreso k poste per referendumo (ĝenerale voĉdonado) ĝi estos akceptata, prefere eĉ unuanime.

715, 59, 4230, 2518, 125, 135, 3771, 134.

4. Ni proponas elekti novan Kontrol-Komitaton. SAT-Rondo Novjorka.

5. Ni proponas konfirmi k meti en la Statuton la projekton pri la reguligo de la funkcioj de l' Kontrol-Komitato. SAT-Rondo Novjorka.

6. Ni proponas aldoni al la Statuto sub paragrafo 11 k litero b) "Vickonsilanto ankaŭ ricevas la cirkulerojn de la gvidaj organoj k rajtas esprimi sian opinion." SAT-Rondo Novjorka. La sekretario 14 652.

7. La Pariza SAT-anar-kunveno de la 2-a de junio 1930:

Konstatante, ke "S-ulo" publikigas nur informojn unuflankajn k partecajn pri la situacio k la vivo en Sovetio, kvankam la tutmonda proletaro havas la rajton ekscii ankaŭ pri la mispaŝoj k pri la malbonaj rezultoj de la politiko de la tieaj regantoj.

Konstatante, ke tia situacio ne estas konforma al la celo de nia gazeto, kiu ja devas ebligi al siaj legantoj akiri mem propran opinion pri diversaj soci-politikaj demandoj.

Proponas, ke speciala komisiono estu elektota ĉe la Londona kongreso por ekzameni, ĉu la rifuzita materialo vere endanĝerigis Sovetion, kiun ĉiu klaskonscia proleto volas ja defendi, sed ne erarojn de ĝiaj gvidantoj.

Proponita k defendita de L. Revo (Lora), SAT-ano 1267.

Akceptita kontraŭ 3 voĉoj.

Korekto (vd. n-on 299): La prop. 2 devas esti subskribita: *Vjaĉeslav Kalaŝnikov* (1125), Nijni-Novgorod.

La "Lignovermo"

(vd. n-ojn 296, 299) ne povas esti prezentata en Londono pro mallongo de tempo restanta por lernado de la roloj! Notu tamen, ke la Novjorka SAT-rondo konsentas, ke rondo, kiu emus akiri la multobligitan tekston por prezenti ĉe si la teatraĵon, petu ĝin ĉe la Red. de "S-ulo".

SOCIALISTA RONDO

serĉas seriozan korespondadon kolektivan kun socialistoj ĉi. Adr. W. Hertel, Meissen, Cöllner Str. 12 (Germ.).

TRA LA MOVADO

KRONIKO

FRANCIO. Ĉe jara regiona kongreso de "Amikoj de Sovetio" en *Marseille* post propono de blinda SAT-ano esp-o estas akceptita kiel perada, interkoresponda lingvo (sovetianoj skribu esp-e al USSR-amikoj por helpi nian aferon). (Marseja SAT-rondo). — *Nancy.* 11 K-doj el nia grupo vizitis dum pentekosto la esp-istajn K-dojn en Saarbrücken k ekskursis komune kun ili tra la Saar-regiono. En la lab. gazeto de N. aperis tre detala k vigla raporto pri tiu esp-ista translima renkontiĝo. — **NEDERLANDO.** Ĉe ni la movado bone kreskas. Nun ni starigis kun la protestanta-katolika k neŭtrala esp. organizoj komitaton, en kiun la instruisto-ligoj estas petataj ankaŭ sendi delegiton. Tiu komitato esploras, kio povas esti farata por akiri ne-devigian esp. instruon en la instruileĝo de Nederlando. Jam du gravaj instruistaj organizoj, kiuj partoprenis ankaŭ la kunvenon, en kiu starigis la nomita komitato, promesis elekti delegiton en la kom. Tiuj du ligoj estas la moderna "Bond van Nederl. Onderwijzers" k la neŭtrala "N. O. G.". Nia Ligo nombras nun jam 720 membrojn. (H. W. A.)

KORESPONDADO

AŬSTRIO

K-do Anton Haindl, Kopernikusgasse 23, Graz, Steiermark, interŝ. PI, fotojn kĉl. Resp. garantiata.

BULGARIO

Vigla bulgaro (23 j.) petegas franci-ajn gesamideanojn garantii k havigi al li laborkontrakton, por ricevi fr. vizon. Pasporton li havas. Urĝe agu! Adr.: Petar Palatev, "18 Bezimena" 26, Bejanski kvartal, *Stanimaka*.

FRANCIO

K-do Klement Roig (masonisto), 18, rue de Générac, *Nîmes* (Gard), kĉl, L, PI.

Ĉina K-do vojaĝanta Eŭropon koresp. kun eŭropanoj, prec. kun sovetianoj. Petas informojn pri K-do Vaselj Eroŝenko, la blinda esp-isto, kiu longtempe vojaĝis en Japanio k Ĉinio. Adr.: Hujucz "Sennaciulo", 14 av. de Corbéra, *Paris*, 12.

K-do H. Senter (nees-isto), *Hilsenheim*, Bas-Rhin, interŝ. PI, PM, kĉl. Resp. garantiata.

15 GEKAMARADOJ

de la Junulara Rondo Esperantista München (S. P.) serĉas gekorespondantojn en la tuta mondo. — Skribu al: K-do Richard Dingfelder, München, Bavario (Germ.), Sendlinger Str. 21/3.

La Administracio ricevis jenan informon de iu Latvia K-do: "Mi petas ne plu sendi al mi "S-ulo" n k "LNE", ĉar ilin ricevi estas nun tre danĝera. La puno estas 4—5-jara malliberejo. Jam 3 n-ojn mi ne ricevis..."

K-do en aliaj landoj respondu al ĉi tiuj frazoj per plej intensa varbado de abonantoj!

NIA POŬTO

16 285. — Ni enmetos vian artikolon, se estas loko.

Est. — Ni aperigos, se estas loko.

12 916. — "Popoldomo" k "Ĉe nia interna mondo" aperos certe, la alia, se loko estas. "Oficisto" estis sendata al red. de "LNE" en Moskvo, k ni ne scias pri ĝia sorto. *Red.*

8864 k multaj aliaj. — Vi mem kulpas. Multfoje ni jam skribis: "Ĉiam citu la celon de via pago sur la koresponda parto de via pagilo."

4030. — Katalogojn ni ne plu havas. Noveldono nun ne ebla. *Adm.*

10 084. — Pro malmulta spaco nun disponebla estas tre dube, ĉu ni povos enpresi vian longan artikolon, kiun ni siatempe bone ricevis. *Red.*

GERMANIO

— Viglan koresp-adon garantias 20 Gek-doĵ pri ĉ. temoj kĉl. Adr.: E. Winkelmann, *Alt Brand*, n-o 9 ap. *Zwickau i. Sa.*

K-do Giese, Haselbrunnerstr. 21, *Plauen/Vogtl.*, kun gemetropolanoj, L, PI, gaz.

K-do Bernhard Bräuer, *Oybin*, n-o 10, b. *Zittau/Sa.*, interŝ. L, PI, precipe kun elektristoj.

HISPANIO

Adresŝanĝo. — K-do Amadeo Bertomen nun loĝas: Tukuman, 1 — 2^o, *Valencia*, kĉl nur PI.

K-doĵ Kongresvizitontoj!

Espereble vi ĉiuj legis la artikolon pri Rotterdam (S-ulo 294), laŭ kiu la sekcio R-dam de FLE intencas organizi komunan ŝipveturadon al Londono. Okazos ĉi tie la 2-an de aŭgusto intern. renkontiĝvespero, por kiu ni bezonas kelkajn eksterlandajn oratorojn. Profitu la interesan vojaĝon tra Rotterdam kaj anoncu vin kiel eble plej baldaŭ al H. Garten, *Slachthuisstr. 20 b*, Rotterdam.

ENHAVO

	paĝo
Rifo sur la vojo	467—68
Voĉoj de SAT-anoj	468
Ĉu indigni aŭ kompati?	468—69
Konsideroj de japana SAT-ano	469
10-a Kongreso de SAT	469
Tra la movado, Nia poŝto, Koresp-ado	470